

續資治通鑑

冊五

卷之三

七

續資治通鑑卷第一百七十四

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀一百七十四

起昭陽赤奮若正月盡柔兆執徐七月凡三年有奇

理宗建道備德大功復興烈文仁武明聖安孝

皇帝

寶祐元年

蒙古憲宗三年

春正月庚寅詔以建安郡王孜爲

皇子改名祺封永嘉郡王御製資善堂記賜之 癸

卯蒙古兵屯漢江侵萬州入西柳關京湖都統高達

調將士扼河關上山大戰至鼇坑石碑港而還 蒙

古主會諸王於鄂諾

舊作幹難今改

河北罷伊克征高麗兵

以薩喇爾岱

舊作扎剌兒帶今改

爲征東元帥

蒙古皇弟呼必

賚聞陵川郝經館於張柔家博覽無不通召入見詰

以經國安民之道經上數十事皇弟大悅遂留王府
蒙古主大封同姓命呼必賚於南京關中自擇其
一姚樞言於皇弟曰南京河徙無常土薄水淺斥鹵
生之不若關中厥田上上古名天府陸海於是皇弟
願有關中遂受京兆分地時諸將皆築第京兆豪侈
相尚皇弟卽分遣使戍興元諸州又奏割河東鹽池
以供軍食立從宜府於京兆屯田鳳翔募民受鹽入
粟轉漕嘉陵 二月己酉朔日有食之 壬子雪詔

臣寮久在遷謫者合自便惟候國殄民者弗赦 戊
辰謫陳垓潮州居住先是宰執言其貪賊不法宜付
有司鞫問然重以臺臣下吏且從遷謫帝曰當如此
以爲人臣懷利事君者之戒 己巳再蠲兩浙漕司
臨安府竹木稅一月 三月壬午帝諭輔臣夔門擇

守切於東南宜速區處 丙申以前參知政事別之

傑薨輟視朝尋贈少師 庚子以韓宣爲遙郡防禦

使守夔州兼副帥 壬寅詔曰比年以來風俗不美

好惡不公臣僚論列固許風聞而廉訪不真是非貿

亂自今大臣除授惟才是用內外臺彈劾竝須審實

毋攬細故潛發陰私其有贓污實迹則祖宗自有成

憲必罰無赦咨爾有位其修身奉法以副朕嘉與維

新之意 蒙古攻海州守臣王國昌逆戰于城下敗

績 夏四月甲寅申嚴廷試挾書之禁 壬戌錄西

柳關捍禦之功高達程大元李和吉文瑄王登及將

士等增秩補官賞賚有差 己巳帝問蜀中近報謝

方叔等言已下夔路徐清叟曰蜀中向後分置四帥

庶有掎角之勢帝曰舊自有四戎帥又有正副帥董

槐曰此亦二矛重弓之意 五月戊寅朔帝曰趙希

堅可差知平江府其人清修儘能撫摩先是帝以吳門擇守諭輔臣謝方叔言平江東控海道年來和糴民力頗困宜得才略善撫摩者故有是命 辛巳省

罷處州稅官二員置麗水縣西尉 己亥賜進士姚

勉以下及第出身 余玠專制四蜀凡有奏疏詞氣

不謹帝不能平會徐清叟入對因言玠不知事君之

禮陛下何不出其不意而召之帝不答清叟曰陛下

豈以玠握大權召之或不至耶臣度玠素失士心必

不敢遂召之六月庚戌四川制置司言玠疾亟詔以

玠爲資政殿學士與執政恩數 辛亥以賈似道爲

資政殿大學士李曾伯端明殿學士職任依舊 戊

午直華文閣湖北運判兼知鄂州余晦朝辭帝曰西

事乏人卿可爲朕行晦曰臣資淺望輕西事素未諳
悉冒承恐誤國帝曰朕與宰執熟籌之無如卿者庚
申以晦爲司農卿四川宣諭使 蒙古命諸王實喇

爾

舊作旭烈兀今改

伐西域

蒙古諸王巴圖遣使乞買珠銀

萬錠蒙古主以千錠授之仍諭曰太祖太宗之財若
此費用何以給諸王之賜王宜詳審之此銀就充今
後歲賜之數 秋七月辛巳帝諭輔臣曰余晦朝辭

已戒其務行寬政是日國子司業葉夢鼎進對言及
三蜀易帥帝曰余晦有才夢鼎曰晦雖小有才蜀當
垂亡危急之秋恐不勝任徐清叟亦言晦不可用帝
不聽 壬午以前參知政事王伯大薨輟視朝 丙

戌以蔡抗施退翁竝兼資善堂直講抗元定之孫也
庚寅溫台處三郡大水詔發豐儲倉米及各州義

廩賑之

甲午以余玠薨輟朝玠之治蜀也任都統

張實任軍旅安撫王維忠治財賦監簿朱文炳接賓
客皆有常度至於修學養士輕徭以寬民力薄徵以
通商賈蜀既富實乃罷京湖之餉邊關無警又撤東
南之戍自寶慶以來蜀閩未有能及之者然久假便
宜之權不顧嫌疑昧於勇退遂來讒口又置機捕房
雖足以廉得事情然寄耳目於羣小故人多懷疑懼
及聞召不自安一夕暴卒或謂仰藥死蜀人莫不悲
之 庚子以董槐兼參知政事 癸卯詔撫諭四川
官吏軍民 八月丁未朔以馬光祖爲司農卿淮西
總領財賦 癸丑詔福建帥司毋得循習以本州寄
居充幕屬 甲寅起居郎蕭泰來出知隆興府先是
起居舍人牟子才與泰來竝除子才四疏辭極陳泰

來茲險汙穢恥與泰來伍泰來不得已請祠遂予郡

丙辰賜楊次山諡惠節楊谷諡敏肅楊石諡忠憲

乙丑詔鑄寶祐新錢以皇宋元寶爲文 九月壬

午以程元鳳兼侍讀牟子才兼侍講 壬辰城夔門

蒙古皇弟呼必賚征雲南壬寅師次忒刺分兵三

道大將烏蘭哈達由西道諸王素赫由東道呼必賚

由中道乙巳留輜重於滿陀城率師前進 冬十月

丙午朔出封樁庫楮四十萬賑行都軍民 蒙古兵

過大渡河又經行山谷二千餘里至金沙江乘革囊

及棧以渡摩娑蠻主索和爾圖舊作唆火脫今改迎降其地在

大理北四百餘里 十一月丙子朔詔獎諭襄陽守

臣高達 乙酉西太乙宮成 己丑賈似道獻所獲

良馬賜詔褒嘉其將士增秩賞賚有差 辛卯蒙古

皇弟呼必賚遣使諭大理降時僧子聰在軍中每贊
皇弟以天地之好生王者之神武不殺皇弟契其言
烏蘭哈達分兵攻白蠻所在寨柵以次下之獨阿達
喇舊作阿塔
刺今改所居半空和寨依山枕江牢不可拔使

人覘之言當先絕其汲道烏蘭哈達率精銳立礮攻

之阿達喇遣兵來拒烏蘭哈達使其子阿珠舊作阿
尤今改

迎擊之寨兵退走遂并其弟阿蘇舊作阿
叔今改城俱拔之

辛丑白蠻送款 十二月丙辰蒙古中道兵薄大理

城初大理主段智興微弱國事皆決於高祥攻異元
文類載程

鉅夫平雲南碑段智興作興
智高祥作高泰祥今從元史是夕祥率衆遁去皇弟呼必

賚遣使追之皇弟既入大理曰城破而我使不出計

必死矣己未西道兵亦至命姚樞搜訪圖籍乃得使

者之尸皇弟怒將屠其城樞及僧子聰張文謙諫曰

殺使拒命者高祥耳非民之罪請宥之樞裂帛爲旗
書止殺之令分號街陌大理之民賴以全活 庚申

以前參知政事劉伯正薨輟朝 蒙古兵出龍首關

癸亥獲高祥斬於姚州皇弟呼必賚班師

〔攷異〕平雲南碑作春振

旅而還今從元史繫於冬月

留烏蘭哈達攻諸蠻之未下者以劉時

中爲宣撫使

蒙古主命宗王哈呼

舊作耶虎今改

與洪福

源征高麗拔禾山東州春州三角山楊根天龍等城

是歲蒙古斷事官孟克薩爾卒孟克薩爾之泣事

也嚴人多怨之蒙古主爲下詔慰其子

寶祐二年

蒙古憲宗四年

春正月乙亥朔蒙古城利州閬州

自是蒙古兵且耕且守蜀土不可復矣

〔攷異〕元史憲宗紀二年汪田

哥修治利州且屯田蜀人莫敢侵軼則寶祐元年事也宋史作二年蓋元人紀其始事宋人紀其落成耳今從宋史

乙未帝

諭輔臣曰李曾伯報北兵攻利州築城已就不可坐

視謝方叔對曰當令余晦禦之 潭州以湘潭縣民

陳克良孝行聞詔旌其閭 蒙古皇弟呼必賚還京

兆以姚樞爲京兆勸農使教民耕植 二月甲辰朔

太常釐正秦檜謚帝因諭輔臣曰謚繆很可也 乙

巳詔二廣吏多貪黷以去天遠而民無告也吏部考

覈嘗仕廣而以貪黷免者勿令再任著爲令 余晦

遣都統甘閏以兵數萬城蜀要地紫金山蒙古汪德

臣選精卒銜枚夜進大破之閏僅以身免城遂爲蒙

古所據 蒙古侵合州廣安軍守臣王堅曹世雄等

敗之 三月戊寅申嚴本路人不許授諸司屬官其

已注授者竝改授 壬午王元善

〔攷異〕宋史本紀作王善今從宋史全文

自

北歸元善凡三使蒙古留七年至是始歸 戊子詔

蠲江淮州軍今年二稅 己丑錄襄城捍禦功高達

王登程大元李和各進職增秩餘補轉有差 辛丑
帝諭輔臣曰謝奕修服除且以郡予之謝方叔曰年
來戚里予郡太多祖宗時高官者必換右蓋有深意
帝曰戚里正卿以上卽換右班此典故也 是春蜀
中旱蒙古諸將以嘉陵漕舟水澀欲棄益昌去汪德
臣曰國家以蜀事付我有死而已柰何棄之盡殺所
乘馬饗士襲嘉川得糧二千餘石雲頂山戍將呂遠
將兵五千邀戰卽陳擒之復得糧五千餘石旣而魚
關金牛水陸運偕至屯田麥亦登食用遂給 夏四
月辛亥詔邊兵頗貧聞邊上多有閒田擇其田之近
便依險者分給軍人以耕 庚申帝問輔臣外間所
聞謝方叔對曰外論皆以謝堂兼江西提舉恐自此
外戚緣例者多矣 乙丑以徐清叟知樞密院兼參

知政事董槐參知政事

六月壬寅朔罷臨平鎮稅

戊申殿中侍御史吳燧承宰相風指論故蜀帥余玠聚斂罔利玠死其子如孫一空帑庾之積而東宜簿錄其財以爲蜀用詔責如孫輸以助蜀 甲寅帝諭輔臣蜀事宜早區處謝方叔曰向來亦有京闈兼制者帝曰此不可緩以李曾伯爲資政殿學士依舊節制四川以賈似道同知樞密院事職任依舊 丙辰帝諭輔臣曰利州王佐堅守孤壘屢挫敵鋒其忠可嘉謝方叔曰此城正介寶峯苦竹隘間佐以忠自奮南永忠薄其城下佐罵擊之永忠流涕而退真忠臣也詔王佐更進一官先是南永忠守隆慶率其屬以城降蒙古教授鄭炳孫先縊死其妻女乃朝服自經癸亥贈炳孫朝奉郎直祕閣訪其子官之 錄行

在繫囚 余晦在四川兵屢敗邊事日亟戊辰詔晦
赴行在 蜀利閬隆慶潼川綿州賦役 閏月壬申
董槐抗疏蜀事孔棘已犯臨戰易將之戒此臣子見
危致命之日也而上下牽制曾未有出身當此任者
願假臣宣撫之名置司夔門以通荆蜀之氣脈帝優
詔答曰士大夫以議論求勝者多以事功自勉者少
朕爲世道人才憂之卿深念蜀事慨然請行足見忠
壯然經理西事當在廟堂更宜勉竭謀猷以副委任
以蒲擇之爲軍器監丞暫充四川制置權司職事
甲戌命包恢爲浙西提點刑獄招捕荻浦鹽寇
壬午以李曾伯爲四川宣撫使兼荆湖制置大使詔
四川事力愈單須合荆閬乃可運掉宜趣李曾伯進
司夔路 己亥罷江灣浮鹽局 秋七月己巳蜀四

川近邊州郡稅賦三年 丁未帝諭輔臣曰聞雲南
力備蒙古果能自立乎謝方叔曰廣右所傳雖未得
實不容不嚴其備 蒙古烏蘭哈達攻烏蠻次羅部
府蠻酋高昇拒戰大破之進至其所都押赤城城際
滇池三面皆水旣險且堅選驍勇以礮摧其北門縱
火焚之皆不克乃大震鼓鉦進而作作而止使不知
所爲如是者七日伺其困乏夜五鼓遣其子阿珠潛
師躍入亂斫之遂大潰至昆澤擒其國王段智興餘
衆依阻山谷分命裨將掩襲約三日捲而內向及圍
合阿珠引善射者二百騎四面進擊烏蘭哈達陷陣
鏖戰又攻纖寨拔之至乾德格城烏蘭哈達病委軍
事於阿珠環城立礮以草填塹衆軍始集阿珠先率
所部搏戰城下遂破其城 己酉詔以思播兩州連

年捍禦其守臣田應寅楊文各進一秩。同知樞密院事兩淮制置大使賈似道乞照陳韓出使湖南例以行府爲名從之。甲寅賜賈涉諡忠肅以似道進用故也。壬戌以湖北安撫知峽州呂文德總統江陵漢陽歸峽襄郢軍馬事暫置司公安上下應援。八月辛未朔帝諭輔臣曰江塘事畢聞軍中科軍人草薦不容不還其直謝方叔曰此見陛下之不遺微小也。癸酉詔以前知閬州兼利州安撫王惟忠付大理獄惟忠與余晦俱慶元人晦之帥蜀也惟忠心輕之呼其小字曰余再五來也晦聞恚甚及召還誣奏惟忠潛通蒙古使其黨丁大全陳大方劾之朝議亦以此掩誤用余晦之失遂下大理大方爲勘官煨煉成獄籍其家。癸未董槐言邇者陛下察貢獻之